

Stap Serem Lav blong God

Thais i no save wanem blong talem o mekem, be hem i wantem blong help.

I Kam long Carolina Maldonado
(I kamaot long wan tru stori)

Stori ia i hapen long Bolivia.

Hem i bin wan hot moning. Thais mo fren blong hem Claudia i stap stori mo laflaf taem tufala i stap wokbaot krosem fil blong futbol. Tufala i jes finis long jim klas mo naoia tufala i stap go long mat klas.

Ol smosmol pikinini i stap long brek taem. Thais i wajem olgeta oli stap pleplei.

Afta hem i luk wan smol gel i stap sidaon hemwan long ol step. Taem oli go kolosap, Thais i luk se hem i stap krae



Thais i saksakem han long Claudia blong kam long smol gel ia.

Claudia i sakem hed mo solda blong hem blong talem no. "Bae yumi let."

Bifo Thais i save talem wan toktok, Claudia i wokbaot i go.

Thais i lukluk smol gel. Hem i gat faef yia olsem. Hem i haedem fes blong hem long tufala ni blong hem mo kavremap hed blong hem wetem han blong hem.

Thais i sidaon narasaed long hem. Gel i muvaot smol.

"?Yu yu Oraet?" Thais i askem wetem wan voes we i sofosof.

Gel i no ansa. Thais i no save stret wanem blong talem o mekem.

"?Mi save helpem yu?" hem i askem nekis kwestin.

Gel ia i leftemap hed.

Nem blong mi, Thais. ?Wanem nem blong yu?"

Gel i go antap long Thais. "Nicol."

"?From wanem yu stap krae Nicol?"

"Evriwan i stap jikim mi from mi fatfat," hem i krae mo talem.

Thais i waepem fes blong Nicol. "Mi sori we oli talem hemia. Hem i nomata se wanem ol pipol oli gat tingting long yu."

"Oli talem long mi se mi no naes."

"!Mi ting se oli rong!" Thais i talem wetem wan smael. "Yu yu naes mo tu, yu yu spesel tumas" "?Yu save hemia?"

Thais i tingting long wan long ol fevret singsing blong hem long Praemeri. Naoia hem i save wanem blong talem.



"Yu yu wan pikinini blong God," Thais i tekem han blong gel mo i talem,

Thais i stap toktok wetem Nicol. Hem i eksplenem olsem wanem Nicol i impoten long Papa long Heven, famli blong hem mo plante we oli lavem hem tumas. Sloslo, Nicol i stat blong smael.

Sam minit i pas, Nicol i stanap mo putum han blong hem raon long Thais. "!Tangkyu!" hem i talem.

Thais i wajem niu fren blong hem i ronwe wetem wan big smael. Hem i wan gudfala filing blong helpem Nicol i filim moa gud mo save hamas God i lavem hem.

Afta Thais tu jam long long tufala leg blong hem. *!Mi mas ron olsem Nicol o sapos no bae mi let long mat klas!!* hem i stap tingting, smael taem hem i stap hariap i go long klas. ●

